

মাওলানা মান্নানের চাঁদাবাজি ও দুর্নীতি তদন্তের দাবি

বরিশাল ব্যুরো

ইনকিলাবের মালিক মাওলানা আবদুল মান্নানের দুর্নীতি, অনিয়ম, চাঁদাবাজি ও অর্থ আত্মসাতের ঘটনা তদন্তের জন্য উচ্চ ক্ষমতাসম্পন্ন কমিটি গঠন এবং ইনকিলাবের মালিকানা জমিয়তকে ফিরিয়ে দেয়ার জন্য সরকারের প্রতি দাবি জানিয়েছেন সম্মিলিত সামাজিক আন্দোলনের নেতারা। গতকাল সংগঠনের বরিশাল জেলা শাখার সভাপতি অ্যাডভোকেট এম ফজলুল হক এবং সাধারণ সম্পাদক ও কেন্দ্রীয় কমিটির সদস্য নূরুল ইসলাম, যুগ্ম-সম্পাদক অ্যাডভোকেট হিরণ কুমার দাস মিত্রসহ নেতৃবৃন্দ এক বিবৃতিতে ওই দাবি জানান। তারা বলেন, ১৯৮৪ সালে মাওলানা মান্নান ইবতেদায়ী সিনিয়র ও কামিল মাদ্রাসা থেকে ইনকিলাবের বার্ষিক গ্রাহক চাঁদা হিসেবে কোটি কোটি টাকা হাতিয়ে নেন। অথচ নিয়মিত পত্রিকা সরবরাহ করেননি। এটা ছিল মাওলানা মান্নানের ইসলামের নামে ধোঁকা ও প্রতারণা। একইভাবে ইনকিলাবের মালিকানা জমিয়তের নামে ঘোষণা করেও পরে নিজের মালিকানায় নেয়া হয়। যা ছিল মাদ্রাসা শিক্ষকদের সঙ্গে বেইমানির শামিল। ওয়ার্কার্স পার্টি একই অভিযোগ এনে ইনকিলাবের মালিক মাওলানা মান্নানের বিচার দাবি করেছে। দলের কেন্দ্রীয় কমিটির সদস্য কমরেড আবদুস সত্তার, নজরুল হক নিলু, জেলা সভাপতি মিজানুর রহমান এবং জেলা সম্পাদক ইসহাক শরীফ এক বিবৃতিতে ইনকিলাবের মতো ইসলামী বিশ্ববিদ্যালয় প্রতিষ্ঠার নামে চাঁদাবাজি ঘটনারও নিন্দা করেন। উদীচীর সভাপতি মানবেন্দ্র বটব্যাল এবং সাইদুর রহমান মিরন মাওলানা মান্নানের বিরুদ্ধে দুর্নীতি ও অনিয়মের অভিযোগ এনে নিন্দা প্রকাশ করেন।